

元代子部書 二卷

元

代

史料刊
史叢
初編

黃山書社

欽察汗國

察

台

汗

國

阿里麻里

伊利汗國

嶺

嶺

夏政院

印

海

羅

度

南

元代子部書 二卷

元

代

史料
叢刊
初編

黃山書社

古今攷

欽定四庫全書

子部十

古今攷

雜家類二

雜考之屬

提要

臣

等謹案古今攷一卷宋魏了翁創稿續古今攷三十七卷元方回補輯了翁以古制多不可考兩漢諸儒惟據叔孫通所定曰猶今之某物孔賈諸疏則又謂去漢以遠雖漢制亦不可攷乃即漢書本紀所載隨文辨證作

古今攷前有自序一則然其書未成僅得二十條又有錄無書者四條咸淳丁卯回得手稿於了翁之子乃推衍其意續成是編首載了翁原書而回又附論於後以鶴山先生曰紫陽方氏曰別之其無書四條回亦補之其劉媪夢與神通一條併發例於下曰鶴山原書有此題而文缺今回以意補之加紫陽方氏曰五字後此皆回所撰不再書此五字或

引古於前則復書之云云案回之所續亦以漢書本文標目而於歷代制度推類以盡其餘如拔劍斬蛇條下則附廣劍考范增舉玉玦條下則附玉佩考蓋特借漢制中一物之名以推求古制而與史家本文則絕不相涉也然了翁所考多在制度回則以在宋之日獻媚賈似道似道勢敗又先劾之既反覆陰狡為世所譏及宋亡之時又身為太守舉城

降元得官總管益為清議所不齒老而無聊
乃倡講道學以謀晚蓋故於中多參以理語
如高帝紀寬仁愛人四字牽引程朱以來諸
大儒論仁之語至列目一十二篇一字之義
幾盈一卷未免涉於支離然回人品心術雖
不足道而見聞尚屬賅洽所考多有可取者
併了翁書錄之亦不以人廢之義也乾隆四
十四年二月恭校上

總纂官 臣 紀昀 臣 陸錫熊 臣 孫士毅

總校官 臣 陸費墀

古今攷原序

敘曰渠陽山中暇日編校經傳自兩漢諸儒去古未遠已不能盡識三代遺制凡冕服車旗類以叔孫通所作漢禮器制度為據其所臆度者無以名之則曰猶今之某物然孔賈諸儒為之疏義則又謂去漢久遠雖漢法亦不可攷因嘆三代遺制始變于周末大壞于秦漢而盡亡于魏晉以後雖名物稱謂字義音釋亦鮮有存者故使經生學士白首窮經而疲弊于訓詁佔畢之末有

終其身而不能盡知者嗚呼是誰之咎歟解之繇曰無
所往其來復吉有攸往夙吉漢承秦弊大難既解是無
所往也而昧于來復夙往之戒徒能隨世就事為秦漢
以後規模賈誼所謂建久安之勢成長治之策蓋欲及
時定制盡復三代之舊為萬世太平計而一時君臣不
足以知此至董仲舒王吉則寢遠寢疎蓋自是人情習
于簡陋古制蓋不可攷矣姑即漢紀隨文辯證作古今
攷魏了翁序

欽定四庫全書

古今攷卷一

宋 魏了翁 撰

元 方回 續

高帝紀

鶴山先生曰高帝者何漢五年羣臣上皇帝尊號此有天下之稱也十二年上諡號曰高皇帝此節惠易名之諡也人主自號皇帝自秦政始而漢因之諡曰高皇帝則亦因始皇帝之陋也三皇五帝稱號聖人未嘗言雖

三王五伯亦未嘗言僅見于孟氏書戴氏禮而禹之為王亦未嘗見凡書之言夏王者皆祭也殷人周人之說始自陋儒俗師強為差等矜抗皇號於過高而妄意帝稱羞與王伍盖春秋時吳楚越皆稱王矣至于戰國則齊魏韓趙諸君亦稱王王號既卑則強者不得不帝於是秦昭王稱西帝齊閔王稱東帝尋懼而皆去之復稱王至秦政二十六年遂兼皇帝之號然猶遲之以二十六年之久亦見其有未慊於心者漢初大抵襲秦以從

民望而於典章法度猥襲秦餘如皇帝之稱最為固陋亦因仍不改于是有效尤而動如南越王稱南武帝蓋生而自為諡矣極于後世如漢哀帝以方士之說為聖劉太平之號唐高宗中宗以武韋二婦人之言有天皇應天之號紛紛錯出由是踵為故常姑摘其一二言之唐玄宗德宗皆以聖神文武皇帝為號此二君昏僻召亂者也而以是稱之又將誰欺德宗尚以為未足乃于朱泚未平之日徇羣臣之請欲更加二字夫此四言且

不敢當其一而唐之君臣少之乃知後世君臣虛名侈靡君臣同一愚也成湯曰武王周文曰寧王則人稱之而已不自居也矧累善積美至十餘字而不厭乎賴神宗黜去尊號之請足以洗千載之陋然尚有未盡改者諡者節以壹惠也今自唐至于國朝帝諡之多至七八字反以字多而難於省記義廣而不能取信且姑以一二言如所謂聖神則大而化聖而不可知矣猶以為未足也加之以文武抑不知聖神不足以統文武耶藉曰

書既言之矣又姑舉其一言之唐帝之諡莫多於宣宗
蓋高祖太宗猶不過七字宣宗至十有八字宣視諸帝
固亦稍優而遂謂元聖至明與武文睿知仁神等字無
一不備夫如是過於堯舜三王遠矣而唐業之衰實始
乎此

漢書

鶴山先生曰漢者何高皇帝起漢中即始王以為代號
也自羲昊以來書志可攷者皆有始祖舜雖側微然自

顓帝以來有國至瞽瞍失之至夏后氏殷人周人以訖于嬴政則皆以始封為代號夏之後為杞至楚悼王而後息殷之後為宋至齊湣王而後息周自后稷訖于赧王大抵三代之宗廟血食皆二千餘年而秦罷侯置守於是始有由匹夫而有天下者故往往無所因襲一時如劉如項如陳不得不以始皇為號至魏晉齊梁隋唐以後則率以初國寢成禪代故又封爵為號亦與漢異

高祖